

APOSTOLIESE GELOOF SENDING VAN SUID AFRIKA



AGS BETHLEHEM

P.B.O No 930004069

**205 Commissioner Straat
Bethlehem**

info@agsbethlehem.org.za

GEMEENTE BELEID

(INGEVOLGE DIE BEPALINGS VAN ARTIKEL 2.4.1 VAN DIE KONSITUSIE VAN DIE KERK)

1. NAAM

Die naam van die gemeente is: **DIE APOSTOLIESE GELOOF SENDING VAN SUID-AFRIKA, AGS BETHLEHEM**

2. ONTSTAAN

Die gemeente glo en verklaar nederig dat:

2.1 dit sy ontstaan, voortbestaan en bestemming van God het;

2.2 dit 'n openbaring van die Kerk van Jesus Christus is, onder Sy heerskappy as Hoof, ooreenkomstig die uitsprake van die Heilige Skrif, die werking van die Heilige Gees en die bedieninge deur Hom ingestel.

3. GELOOFSBELYDENIS

Die gemeente onderskryf die Geloofsbelydenis soos verklaar deur die Apostoliese Geloof Sending van Suid-Afrika ingevolge afdeling A.3 (Aanhef) tot die konstitusie van die kerk, wat soos volg lees:

3.1 ONS GLO in die Ewige, Drie-enige God, almagtige Skepper, Onderhouer en Regeerder van die ganse skepping.

3.2 ONS GLO in God die Vader, die Outeur van die skepping en Verlosser.

3.3 ONS GLO in Jesus Christus die Enigste Seun van God die Vader, ware God wat ter wille van die mensdom en sy verlossing, van die hemel neergedaal en vlees geword het; wat verwek is deur die Heilige Gees en gebore is uit die maagd Maria; wat op die aarde geleef het en gekruisig is, gesterwe het en begrawe is, wat uit die dood opgestaan en opgevaar het na die hemel waar Hy aan die regterhand van die Vader sit.

3.4 ONS GLO in die Heilige Gees, ware God wat van die Vader en die Seun uitgaan, wat die wêreld oortuig van sonde, geregtigheid en oordeel en in die hele waarheid lei.

- 3.5 **ONS GLO** dat die Bybel die woord van God is, geskryf deur mense onder die inspirasie van die Heilige Gees. Ons glo dat dit gesaghebbend die wil van God verkondig en ons alles leer wat vir saligheid nodig is.
- 3.6 **ONS GLO** dat alle mense na die beeld van God geskape is; as gevolg van hulle sondige opstand is hierdie beeld geskend, dat alle mense voor God gesondig het en dit die wil van God is dat alle mense saligheid sal ontvang deur geloof in Jesus Christus.
- 3.7 **ONS GLO** in die doping in die Heilige Gees, met die aanvanklike teken van spreke in tale soos aan alle gelowiges belowe is. Ons glo in die werking van die gawes en vrug van die Gees in die lewe van 'n Christen. Ons glo dat 'n Christen 'n dissipel van Jesus Christus behoort te wees wat 'n toegewyde en heilige lewe lei.
- 3.8 **ONS GLO** dat Jesus Christus die Hoof van die Kerk is wat deur die Heilige Gees saamgevoeg is en wat bestaan uit alle wedergebore gelowiges. Die Kerk is verantwoordelik vir die verkondiging en demonstrasie van die evangelie en God se wil vir alle mense. As charismatiese gemeenskap verkeer hulle onderling en stig mekaar.
- 3.9 **ONS GLO** dat die doop van die gelowige deur onderdompeling en die Nagmaal instellings van Jesus Christus is en deur die Kerk onderhou moet word.
- 3.10 **ONS GLO** dat op die God-bestemde tyd Jesus Christus Sy Kerk sal kom wegneem.
- 3.11 **ONS GLO** in die oordeelsdag wanneer Jesus Christus die lewende en die dode sal oordeel. Ons glo in die opstanding van die liggaam en 'n ewige lewe vir die regverdige en ewige straf vir die goddelose. Ons glo in 'n nuwe hemel en 'n nuwe aarde waar God in heerlikheid sal regeer.

4. **DOELSTELLING**

Om 'n Christus Sentreerd, Woord gebaseerde, Gees gedrewe Familiakerk te wees, wat 'n impak maak orals waar ons gaan

5. SENDING

- 5.1 Die gemeente onderskryf die Sending van die Apostoliese Geloof Sending van Suid-Afrika ingevolge afdeling A.4 (Aanhef) tot die konstitusie van die kerk, wat soos volg lees:

Die Sending van die kerk is:

- 5.1.1 om God te verheerlik;
- 5.1.2 om die koninkryk van God te verkondig deur die bediening van die evangelie van Jesus Christus deur die krag van die Heilige Gees;
- 5.1.3 om die behoeftes van die mens in totaliteit aan te spreek;
- 5.1.4 om gelowiges te ontwikkel, toe te rus en geleentheid te gee vir bediening;
- 5.1.5 om die invloed van die kerk buite sy grense en die buiteland uit te brei;
- 5.1.6 om die gemeenskap van die gelowiges en netwerk van bedieninge te promoveer.

- 5.2 Daarom is die sending van die gemeente:

- 5.2.1 Deur die ontwikkeling en vestiging van geïnspireerde leierskap en bestuur binne 'n dinamiese struktuur en aksies om –
- 5.2.2 n Christosentriese evangeliese karakter en rentmeesterskap in die gemeente te ontwikkel en te versterk;
- 5.2.3 te sorg vir die geestelike en tydelike behoeftes van die lidmate van die gemeente;
- 5.2.4 die lidmate, onafhanklik en kollektief, te bemagtig om hul talente en roeping in diens van die kerk van Jesus Christus en in die gemeenskap te gebruik, sodat mense hul aan Jesus Christus sal verbind en hulle volle lewenspotensiaal bereik.

6 KERNWAARDES OF BEGINSELS

Integriteit
Uitnemendheid
Eenheid
Diensbaarheid
Liefdevol
Vrygewig

7 REGSSTATUS

Die gemeente is 'n regspersoon met ewigdurende regsopvolging, geregistreer as 'n goedgekeurde plaaslike gemeente van die Apostoliese Geloof Sending van Suid-Afrika deur die Nasionale Leierskapforum ingevolge artikel 2.1 van die konstitusie van die kerk, en die beheerliggaam soos saamgestel in terme van hierdie beleid is sy agent.

Gevolgtrek –

7.2 is die gemeente 'n onafhanklike regspersoon onderskei van die kerk en/of sy lidmate, en/of die lidmate van die gemeente en sal, onderhewig aan die regulasies, as onafhanklike regspersoon:

- 7.2.1 geregtig wees om vaste eiendom, bates en fondse te besit onderskei van die kerk en sy lidmate of die lidmate van die gemeente;
- 7.2.2 geregtig wees om regte, verpligtinge, voorregte, magte en verantwoordelikhede op te neem, onderskei van die kerk en sy lidmate of die lidmate van die gemeente;
- 7.2.3 geregtig wees om regsaksies in sy eie naam in te stel en/of te verdedig;
- 7.2.4 geregtig wees om regshandeling van watter aard ookal in sy eie naam te verrig;
- 7.2.5 geregtig wees om eiendom te verkry, te vervreem en/of te beswaar en op enige wyse daarmee te handel;
- 7.2.6 geregtig wees om persone in diens te neem, welke indiensneming insluit die beroep van 'n pastoor of enige ander bedienaar soos bedoel in die konstitusie van die kerk.

7.3 Die beheerliggaam het die bevoegdheid om enige regshandeling te verrig wat nodig mag wees om die roeping van die kerk te vervul in besonder, en om die

besigheid en sake te bedryf, en om die magte te beoefen, en om die bedrywigheide te beheer van die gemeente namens die gemeente.

7.4 Die beheerliggaam sal inkomste, uitgawes, bates en laste van die plaaslike gemeente ontvang, administreer en daarvoor rekenskap gee, ingevolge die bepalings van die Nasionale Finansiële Beleid wat deel vorm van die regulasies tot die konstitusie van die kerk.

7.5 Die konstitusie en regulasies van die kerk sal die konstitusie en regulasies van die gemeente wees.

8 LIDMAATSKAP

‘n Lidmaat van AGS Bethlehem gemeente sal ‘n natuurlike persoon wees, wat erken word as ‘n lidmaat en wat die Konstitusie van die AGS van SA. Die Lidmate inskakelingsproses word ook deur die Bestuurspan bepaal.

8.1 Lidmaatskapvoorwaardes

Die lidmate van die gemeente sal persone wees:

- a. wat wedergebore is
- b. Die doop van die gelowiges ondergaan het;
- c. wat erken is as lidmate van die gemeente by die inwerktrading van hierdie beleid; wat die “Geloofsbelydenis” soos hierin vervat, onderskryf en aanvaar;
- d. die huwelikstaat tussen man en vrou, volgens Efesies 5:21-32, en elders in die Bybel uiteengesit, eerbiedig;
- e. wat die uitsprake aanvaar t.o.v. leerstelling, etiek en liturgie soos goedgekeur deur die Nasionale Leierskapforum van die kerk.

8.2 Verpligtinge/Pligte

Daar word van die lidmate van die gemeente verwag om:

- a. hul te onderwerp aan die leierskap van die Presiderende pastoor en/of Gemeenteleier soos bepaal in artikel 2.4.2 van die konstitusie van die kerk;
- b. hul te onderwerp aan die bestuursvoorskrifte soos bepaal deur die Beheerliggaam van die gemeente ;

- c. aktief betrokke te wees in die gemeenskaplike aktiwiteite van die gemeente soos bepaal deur die Leierskap en/of Beheerliggaam van die gemeente;
- d. finansiell die werk van die Here in die gemeente te ondersteun, nl. Tiende en offerandes;
- e. aktief die werk van die Here te ondersteun deur Gebed;

8.3 Dissiplinêre en Griewe prosedures

Die Dissiplinêre en Griewe prosedures van die gemeente sal ooreenkomstig die bepalings van bylae 11.1 tot die konstitusie van die kerk wees, met spesiale verwysing na klousules 11.59 tot 11.64 (verwys na bylae 2 hierby)

9 BEHEERLIGGAAM / BESTUURSSPAN

9.1 Visie

Ingevolge die bepalings van Artikel 2.4.2 van die Konstitusie van die die AGS van SA, sal die Presiderende Pastoor die Visiedraer van die gemeente wees.

9.2 Agent

Soos bepaal ingevolge artikel 2.5 van die konstitusie van die kerk sal die Beheerliggaam die agent van die gemeente wees.

9.3 Naam

Die Beheerliggaam van die gemeente sal bekendstaan as die **Bestuursraad**

9.4 Kwalifikasies

Persone aangestel of verkies as lede van die Beheerliggaam van die gemeente sal:

- 9.4.1 geregistreerde lidmate van die gemeente ingevolge klousule 8 wees;
- 9.4.2 gedoopt wees met die Heilige Gees en daartoe getuienis lewer;

- 9.4.3 kwalifiseer in terme van die basiese skriftuurlike beginsels soos beskryf in 1 Timoteus 3:1-7 en Titus 1:5-9;
- 9.4.4 beskik oor leierskap- en bestuursvaardighede en bereid wees om hul te onderwerp aan voortgesette ontwikkeling van hierdie vaardighede;
- 9.4.5 aktief betrokke wees in die aktiwiteite van die gemeente.
- 9.4.6 gereeld (maandeliks) sy/haar tiendes by die lokale gemeente inbetaal;
- 9.4.7 nie 'n ongerehabiliteerde insolvent wees nie.

9.5 Samestelling

Die Beheerliggaam van die gemeente sal soos volg saamgestel wees:

- 9.5.1 Die presiderende pastoor of gemeenteleier soos aangestel ingevolge artikel 2.1.2 van die konstitusie van die kerk, en sal die leier en visiedraer van die gemeente wees, en
- 9.5.2 Soveel lede wat nodig is en kwalifiseer in terme van klousule 9.4;
- 9.5.3 die Beheerliggaam soos saamgestel in terme van klousule 9.5.1 en 9.5.2 sal uit eie geledere persone aanstel/ver kies tot administratiewe funksies of ander persone koöpteer vir hierdie doel vanuit die gemeente.

9.6 Aanstellings prosedures

Die Beheerliggaam sal soos volg aangestel word:

- 9.6.1 die Presiderende pastoor sal die name van die bestaande Beheerliggaam (onderworpe aan klousule 9.5.2), soos by datum van die aanvaarding van hierdie beleid, aan die gemeentevergadering soos gereël voorlê vir bekragtiging as agent van die gemeente;
- 9.6.2 'n twee-derde meerderheidstem van die lidmate teenwoordig by die gemeentevergadering sal die aanstelling van die Beheerliggaam soos voorgelê in terme van klousule 9.6.1 bekragtig.

9.7 Dienstermyn

Die lede van die Beheerliggaam, voltydse pastore uitgesonderd, sal amp behou solank hy/sy aktief in die gemeente is en in goeie stand met die gemeente is; tensy hy/sy bedank, ontslaan word

Voltydse en betalende lede sal amp behou binne die riglyne van die kontrak aangegaan.

9.8 Vakatures

Enige vakature wat mag ontstaan in die Beheerliggaam soos aangestel in terme van hierdie beleid, sal gevul word deur:

- i. die oorblywende lede tydens die volgende Beheerliggaam vergadering
- ii. Deur die koöptering van 'n nuwe lid deur die Beheerliggaam soos bepaal deur klousule 9.4.3

9.9 Funksies

Die Beheerliggaam sal:

- 9.9.1 ingevolge die bepalings van klousule 8 lidmate opneem, toerus en versorg, dissiplineer of hul lidmaatskap beeindig;
- 9.9.2 verantwoordelik wees vir die tydelike en geestelike belange van die gemeente;
- 9.9.3 ingevolge die regulasies van die Apostoliese Geloof Sending van Suid-Afrika enige pastoor beroep van die lys van geordende pastore van die kerk;
- 9.9.4 verantwoordelik wees vir die bestuur van die sake van die gemeente in terme van klousule 7 en die Nasionale Finansiëlebeleid (Bylae 10 tot die konstitusie van die kerk) van die Apostoliese Geloof Sending van Suid-Afrika;
- 9.9.5 die reg voorbehou om enige wettige instansie binne die gemeente op te rig of te vestig, wat geestelik of tydelik in die belang van die gemeente geag

mag word, bv. Jeug en kinderbediening, vrouebediening/forum, ouderling/diaken raad, bedieningsraad ens.

9.10 Vergaderingsprosedures

Alle vergaderings van die Beheerliggaam sal gehou word in terme van die bepalings van Bylae 1 (Reglement van Orde) tot die konstitusie van die kerk.

9.10.1 Gedragskode

Lede van die Bestuurspan sal die Gedragskode vir ouderlinge soos bepaal in die Bylae 7.5 tot die Konstitusie van die kerk onderteken.

9.10.2 Griewe- en Dissiplinêre Prosedures

Die Dissiplinêre en Griewe prosedures van die gemeente sal ooreenkomstig die bepalings van bylae 11.1 tot die konstitusie van die kerk wees.

9.10.3 Pligte en Magte

Die pligte en Magte van die Bestuursraad sal in ooreenstemming wees met die beplaings van Artikels 2.4.3 tot 2.4.6, 2.5.2 en 2.5.3 van die konstitusie van die AGS van SA

9.11 Bedieninge

Die bedieninge van die Gemeente sal onderleiding van die Presiderende Pastoor funksioneer.

10 ALGEMENE BESIGHEIDSVERGADERING

10.1 Elke vierde jaar met ingang van 2025 sal 'n Algemene Besigheidsvergadering gehou word op 'n plek en tyd soos bepaal deur die Beheerliggaam van die gemeente;

10.2 Die Algemene Besigheidsvergadering sal bestaan uit alle geregistreerde lidmate van die gemeente, wat een en twintig (21) dae vooraf kennis gegee is van die vergadering;

10.3 'n Korum by die Algemene Besigheidsvergadering van die gemeente sal die lede teenwoordig wees by so 'n vergadering;

- 10.4 Die Algemene Besigheidsvergadering van die gemeente sal verslag ontvang van die geestelike en tydelike welstand van die gemeente, die Beheerliggaam verkies en besluit neem oor alle wysigings tot die gemeentebelid.

11 ALGEMENE BEPALINGS

11.1 Beleid

Om hierdie beleid op enige manier te wysig moet geskrewe kennisgewing voorgelê word aan die Sekretaris van die Beheerliggaam ten minste sestig (60) dae voor die volgende Algemene Besigheidsvergadering. In sodanige kennisgewing moet volledige besonderhede van die voorgestelde wysiging/s, insluitende 'n motivering daarvoor, verstrek word. Hierna sal kennisgewing ten minste een en twintig (21) dae voor die Algemene Besigheidsvergadering gesirkuleer word en 'n twee derde meerderheid stem van die teenwoordige lede by die Algemene Besigheidsvergadering sal besluit of die beleid so gewysig sal word al dan nie.

11.2 Vrywaring teen ongemagtigde optrede

Onder geen omstandighede sal die gemeente of enige ander regspersoon soos bepaal in hierdie beleid verantwoordelikheid aanvaar vir die aankope of enige ander finansiële- of regs aanspreeklikheid deur enige persoon of liggaam aangegaan, wat nie behoorlik daartoe gemagtig is deur die betrokke liggaam of regspersoon ingevolge die bepalings van hierdie beleid nie.

11.3 Vrywaring van lede

Elke lid van enige statutêre liggaam of regspersoon, soos beskryf in hierdie beleid, sal deur die gemeente gevrywaar wees van verliese, uitgawes of skulde deur hom/haar aangegaan in die uitvoering van sy/haar pligte, met dien verstande dat sodanige verliese, uitgawes of skulde aangegaan, nie as gevolg van sy/haar eie oneerlikheid, opsetlikheid of versuim veroorsaak is nie.

11.4 Vrywaring teen optrede van ander

Geen lid van enige statutêre liggaam of regspersoon, soos beskryf in hierdie beleid, sal aanspreeklik wees vir die optrede, versuim of onbetaalde skulde van enige ander lid van die betrokke statutêre liggaam of regspersoon, of vir enige verlies wat die gemeente op enige wyse mag ly nie, tensy sodanige optrede, versuim, onbetaalde

skulde of verlies veroorsaak is as gevolg van sy/haar eie oneerlikheid, opsetlikheid of versuim.

VOORGESTELDE BELEID 2025

12 GOEDKEURING VAN DIE GEMEENTEBELEID

Goedkeuring ingevolge die bepalings van artikel 2.4.1 van die konstitusie van die Apostoliese Geloof Sending van Suid-Afrika:

12.1 Gemeente goedkeuring

Hiermee word bevestig dat hierdie beleid goedgekeur is deur 'n twee-derde meerderheid van die lidmate teenwoordig by 'n behoorlik gekonstitueerde vergadering van die gemeente gehou op 20__ te

VOORSITTER

GEMEENTESEKRETARIS

DATUM

12.2 Streek Leierskapforum goedkeuring

Hiermee word bevestig dat hierdie beleid in ooreenstemming is met die bepalings van die konstitusie van die Apostoliese Geloof Sending van Suid-Afrika, en as sulks goedgekeur is deur dieStreek Leierskapforum tydens 'n vergadering gehou op 20__ te

STREEKVOORSITTER

STREEKSEKRETARIS

DATUM